

კვიპროსული კინემატოგრაფიის დღეები საქართველოში – თემატური და სტილისტური თავისებურებები

სულ რაღაც თხუთმეტიოდე წლის წინ ევროკავშირმა უპრეცედენტო, ან, იქნებ, პრეცედენტული გადაწყვეტილება მიიღო: გეოგრაფიულად აზიური და კულტურულ-პოლიტიკურად ევროპული კუნძული, უფრო ზუსტად კი, კუნძულის ერთი ნაწილი ევროკავშირში გააწევრიანა – 2004 წელს კვიპროსის რესპუბლიკა (სინამდვილეში, კვიპროსის ე. წ. ბერძნული მხარე) ევროკავშირს, მოგვიანებით კი ევროზონას შეუერთდა. დადგა ახალი რეალობა ევროპისთვის, პირველ რიგში კი კვიპროსელი ხალხისთვის. ამ რეალობამ ახალი გამოწვევები გააჩინა. მათგან ერთ-ერთი, ალბათ, საკუთარი იდენტობის ძიება იყო, უფრო სწორად, ახალი იდენტობის სტატუსის მოპოვება სრულიად პარადოქსულ და დრამატულ სიტუაციაში, როდესაც, ერთი მხრივ, იმავე ნაციონალური იდენტობის ხალხს სხვა სახელმწიფო აქვს, რომელიც, ასევე ევროკავშირის წევრია, და მეორე მხრივ, იმ ძირძველ ტერიტორიაზე, რომელიც შენი იდენტობის ერთ-ერთ მარკერს წარმოადგენს, სხვა იდენტობის ხალხს დამოუკიდებელი ერთეული შეუქმნია.

აი, ასეთ რთულ ფონზე, კვიპროსმა მოახერხა და ქვეყნის იდენტობის ერთ-ერთ მარკერად კვიპროსული კინემატოგრაფი აქცია. "ყოველ ნაციონალურ კულტურას, რამდენად მძიმე იდეოლოგიურ ზეწოლასაც არ უნდა განიცდიდეს ის საკუთარ თავზე, მაინც გააჩნია რემისიისადმი ბუნებრივი მიდრეკილება."¹ ძნელი სათქმელია ეს ბუნებრივი პროცესი იყო თუ მიზანმიმართულად, სოლიდური ფინანსური რესურსის გაღებით მიღებული შედეგი, მაგრამ ფაქტია, რომ თანამედროვე მსოფლიო კინემატოგრაფიაში კვიპროსული კინო ცნობად, თავისთავად და ანგარიშგასაწევ ფენომენად მკვიდრდება, თანაც, მაშინ, როცა ევროპულ კინოს უჭირს კონკურენცია გაუწიოს ჰოლივუდს. ერთი ბუნებრივი და უეჭველი ფაქტორი ამ ყველაფერში უთუოდ არის ის, რომ ევროკავშირში გაწევრიანების შემდეგ კვიპროსმა მოიპოვა გარანტირებული მშვიდობა და მზარდი ეკონომიკური რესურსი, რაც ყოველთვის არის ხოლმე ხელოვნების აღორძინების ან განვითარების მთავარი წინაპირობა.

ახალი პოლიტიკური რეალობა კვიპროსისთვის დაახლოებით იგივეა, რაც დასავლეთ გერმანიისთვის მეორე მსოფლიო ომის შემდგომი პერი-

¹ Краснова 1987, 14.

ოდი. მსგავსი რეალობა კი მსგავს ტენდენციებს აჩენს ისეთი განსხვავებული მენტალობის ხალხშიც კი, როგორიც გერმანელები და კვიპროსელი ბერძნები არიან. ორივე ქვეყნის კინემატოგრაფში (ზემოაღნიშნულ პერიოდებში) საკმაოდ მნიშვნელოვან ადგილს იკავებს "ახალი რეალიზმის" ძიება. ეს ტერმინი, თავის დროზე, ისტორიკოსმა გუსტავ ჰარტლაუმმა დაამკვიდრა. რეალიზმისაკენ სწრაფვის "ახალი ტალღა" სახვითი ხელოვნებიდან წამოვიდა. სახვითი ხელოვნების წარმომადგენლებს დაუძლეველი სურვილი ჰქონდათ, შეეგრძნოთ მოვლენები და საგნები ისე, როგორც ეს რეალობაში იყო, ყოველგვარი რომანტიზმისა და იდეალიზმის გარეშე.² ამ გადასახედიდან ყურადღების ღირსია 2018 წელს ადონის ფლორიდისის რეჟისორობით გადაღებული კვიპროსული ფილმი "როზმარი", რომელმაც უკვე არაერთი ქვეყანა და კონტინენტი მოიარა და რამდენიმე საერთაშორისო კინოფესტივალის გამარჯვებულია. ფილმის მიხედვით, კოსტასი – სატელევიზიო სერიალის სცენარისტი, რომელსაც პროდიუსერი ახალი ეპიზოდების დაწერას დაჟინებით სთხოვს, შთაგონებას ეძებს და უცნაური მეზობლების მიყურადებას იწყებს; მათ ტრაგიკულ ყოველდღიურობას საპნის ოპერად გარდაქმნის და სერიალის რეიტინგიც მაღლა იწევს. სცენარისტის ყურადღების ცენტრში ახალგაზრდა ქალიშვილი როზმარი ექცევა. მის იდუმალებით მოცულ ისტორიას მწერალი ფაზლივით აწყობს და ამასობაში, სრულიად მოულოდნელად, საკუთარი წარსულზე შოკისმომგვრელ ამბავს იგებს.

ფილმში ბევრია ისეთი სახე, პასაჟი, პერსონაჟი, რომლის ყოფნა სიუჟეტურ ქარგას სრულიად არ სჭირდება, მაგრამ არყოფნა წარმოუდგენელია, იმდენად განსაკუთრებულ შთაბეჭდილებას ახდენს, ისე ორგანულადაა შერწყმული და იმხელა პიკანტურობას სძენს ფილმს. შეიძლება ითქვას, რომ ფლორიდისმა არატრადიციული სიუჟეტური სვლებით კინოაზრის სხვაგვარი განვითარება დაიწყო. ერთია კინოაზრი და კინოენა, მაგრამ "როზმარის" დიალოგების ავტორი ცალკე ნომინაციაში გამარჯვებას უთუოდ იმსახურებს:

00:08:35,880 --> 00:08:37,880

პაპის რა დაემართა? (აკვარიუმის თევზზე ეკითხება)

00:08:38,240 --> 00:08:42,040

– მოკვდა გადმობარგებისას.

– ვიზიარებ, არ ვიცოდი.

00:08:43,080 --> 00:08:45,080

– გმადლობ.

00:08:48,560 --> 00:08:52,040

² "Искусство кино", 1965, №4, 126.

თუ მოკვდა, საჭმელს რატომ უდებ?

00:08:53,320 --> 00:08:55,320

– ჩვევია.

– მაშინ ცოტა დაუდე,

კიდევ არაფერი დამართო.

.....

00:07:21,640 --> 00:07:24,040

არ შეიძლება სულ გეძებდეთ და

ვერ გპოულობდეთ, კოსტას.

00:07:24,240 --> 00:07:27,240

ჩემი უფლებაა ვერ გპოულობდეთ.

რა უფლებები, არ იცი, რომ აღარაა უფლებები?!

00:07:35,120

რადგან ადამიანად დაიბადე ე. ი. უფლებები გაქვს?

ბოლოს ყველა უსამსახუროდ დავრჩებით

და ვჭამოთ მერე ადამიანის უფლებები.

უნდა აღინიშნოს, რომ "როზმარი" იმ ფილმთა კატეგორიას მიეკუთვნება, რომელსაც ჩვეულებრივი ადამიანი აინტერესებს. ზოგადად, ეს არის იდეოლოგია, რომელმაც მეორე მსოფლიო ომის შემდეგ განსაზღვრა კინოს არსი და რომელიც დღემდე მოქმედებს. სწორედ ამ პერიოდიდან გახდა მნიშვნელოვანი თანამედროვე, ასე ვთქვათ, რიგითი ადამიანის ყოველდღიურობა. დადგა პიროვნების, ინდივიდის (და არა მასისა და მისი თავკაცის) ყოფის, სულიერი მდგომარეობის მხატვრულ ნაწარმოებში ასახვის დრო და ხელოვანთა კვლევის ობიექტში მოექცა ჩვეულებრივი (და არა გმირი) ადამიანის განცდა, ვნება, გრძნობა, სატკივარი, წუხილი, ფიქრი, განსჯა, ტკივილი.³

"როზმარი" არის ფილმი, რომელიც არაერთხელ გულიანად გაგაცინებს კიდევ, უკიდურესადაც დაგაბავს, დაგაინტრიგებს, დაგთრგუნავს და ამოგასუნთქებს ან დაგახრჩობს. ფილმს ვერ მივაკუთნებთ ვერცერთ ჟანრს, მას განსაკუთრებულობას სძენს სწორედ ჟანრების დამაინტრიგებელი სინთეზი: ესაა დრამა ტრილერის ელემენტებით, კომიკური გადახვევებით და ანტიკური ტრაგედიის ელფერით. საკმარისია მაყურებელს გამორჩეს სულ ერთი ფრაზა და ფილმის მთავარი გამოცანა საიდუმლოდ დარჩება.

"ფილმი-გამოცანა" ასევე, 2018 წელს რეჟისორ ალიკი დანეზი-კნატ-სენის გადაღებული ფილმი "ჩაინათაუნი – სამი თავშესაფარი", რომელიც მითოლოგიური სიუჟეტით იწყება, ოღონდ, არა ბერძნული, არამედ,

³ კუნცევ-გაბაშვილი 2013, 113.

ჩინური მითოლოგიიდან, მაგრამ ფილმის ჩაინათაუნი საბერძნეთის დედაქალაქშია. *"ჩინური ტრადიციის თანახმად, მეხუთე თვის მეხუთე დღე განსაკუთრებულია. ამ დღეს დაბადებული ბავშვები ბედისწერის რჩეულები არიან."* – ასეთი ნარატივით იწყება ფილმი. კლიო, ჩინელი მამისა და კვიპროსელი დედის ქალიშვილი, 18 წლის ასაკში იგებს, რომ მისი მამა ბუნებრივი სიკვდილით არ გარდაცვლილა და ჩინურ მაფიას მოუკლავს. გოგონა შურისძიებას გადაწყვეტს. მამის მეგობრის, მზარეული ლინის დახმარებით, ქალიშვილი პოულობს მკვლელებს, მაგრამ მალე ხვდება, რომ ლინი დიდ საიდუმლოს ინახავს...

"ჩაინათაუნი", როგორც ჩანს, კარგად გაკეთებული კომერციული ფილმების რიგს უნდა მივაკუთვნოთ. მის გადაღებაზე სამასი ათასი ევრო დახარჯულა. ფანტასტიკური ფილმების საერთაშორისო ფესტივალზე იგი საუკეთესო ზოევიკად დასახელდა. ამ ფილმს კვიპროსული კინოსგან სრულიად არაკვიპროსული გარემო და თემები გამოარჩევს.

მხოლოდ მიმდინარე წლის განმავლობაში კვიპროსული კინოს დღეები გაიმართა ამერიკაში, რუსეთში, ესპანეთში, ამას წინათ კი – ინდოეთში სახელწოდებით "ევროპული კინო შენს ქალაქში". ეს ჩვენებათა ციკლი 2019 წლის დეკემბერში თბილისმა დახურა თსუ-ს პირველი კორპუსის ღონისძიებათა დარბაზში წარმოდგენილი 4 კვიპროსული ფილმით. როგორ და რა კრიტერიუმებით ავარჩიეთ საპრეზენტაციო ფილმები? პირველ რიგში, აქტუალური იყო, რომ მაყურებლისთვის თემატური, სტილისტური თუ ჟანრობრივი მრავალფეროვნება შეგვეთავაზებინა. ფილმების აღიარება, გამოხმაურებები და ნომინირებულობა, ბუნებრივია, არჩევანს გვიადვილებდა. პრიორიტეტული იყო, ასევე, მოგვეპოვებინა უახლესი ფილმები, რათა მათ მიმართ ინტერესი მეტი ყოფილიყო და, მეორე მხრივ, პროდიუსერებისგან ჩვენების უფლების საკითხზე კომუნიკაციის პროცესი გამარტივებულიყო.

ამ კრიტერიუმების მიხედვით, ზემოაღნიშნულ ორ ფილმთან ერთად, ჩვენი ინტერესის არეალში მოექცა 2016 წელს პეტროს ხარალამბუსის მიერ გადაღებული ფილმი "ბიჭი ხიდზე", რომელიც უკვე წარდგენილი იყო ორმოცდაათზე მეტ საერთაშორისო ფესტივალზე და გამარჯვებულია ცამეტ სხვადასხვა ნომინაციაში. სათაურიდან გამომდინარე, შეიძლება მაყურებელს გაუჩნდეს მოლოდინი, რომ ნამუშევარი ეკრანული ვერსიია იმავე სახელწოდების ბრიტანული (არაერთგზის დაჯილდოებული) წიგნისა,⁴ რომელიც 2017 წლის საბავშვო ბესტსელერად იქცა, მაგრამ ეს არაა ფილმი მონსტრებსა და განსაკუთრებული უნარით დაჯილდოებულ ბიჭზე. ფილმის პერსონაჟი თორმეტი წლის ჩვეულებრივი ბიჭუნაა, რომლის

⁴ Carey, 2017.

უდარდელი ცხოვრება იდილიურ კვიპროსულ სოფელში მკვლევარობის შემთხვევის გამო ერთბაშად იცვლება. მისი სამაგალითო ოჯახი თურმე არაერთ ძველ საიდუმლოს ინახავს. ჭეშმარიტების ძიებისა და თვითშეცნების გზაზე მოზარდი სიყვარულის, ოჯახური სითბოსა და სიმამაცის ნამდვილ მნიშვნელობას მიაგნებს.

კვიპროსული კინოს დღეები საქართველოში იხსნება საიმონ ფარმაკასის 2018 წელს გადაღებული ფილმით "განთიადი კიმერიაში". ეს რეჟისორის მეორე ნამუშევარია, რომელიც წლის საუკეთესო კვიპროსულ ფილმად დასახელდა. ფარმაკასის ამ პირველ სრულმეტრაჟიან ფილმს სხვადასხვა საერთაშორისო ფესტივალზე მიღებული აქვს ჯილდოები: "საუკეთესო ახალბედა რეჟისორისთვის", "მაცურებლის სიმპათია", "მომავლის საუკეთესო ფილმი", "საუკეთესო საერთაშორისო სრულმეტრაჟიანი ფილმი" და სხვა.

ფილმის მიხედვით, კვიპროსის ერთ პატარა სოფელში ტრაგიკომიკური სიტუაცია თამაშდება, როცა ერთი "უცნაური მფრინავი ობიექტი" მის ტერიტორიაზე აღმოჩნდება.

ფილმში არაა ხმელთაშუა ზღვის არაჩვეულებრივი ლურჯი სანაპიროები და მდიდრული ცხოვრება – ეს ეკონომიკურ კრიზისში მყოფი კვიპროსია, რომელიც ევროკავშირის წევრად იმკვიდრებს თავს. ამის საილუსტრაციოდ პირველივე დიალოგი გამოდგება:

00:00:11,979 --> 00:00:13,771

ზუსტად არ ვიცი, მაგრამ...

00:00:13,771 --> 00:00:15,771

როგორც ჩანს კვიპროსისკენ მიემართება.

00:00:15,780 --> 00:00:17,180

კვიპროსი, ტეხასი?

00:00:17,380 --> 00:00:19,660

არა. არა, არა. კვიპროსი, ევროპა.

00:00:19,660 --> 00:00:21,620

კუნძულია ხმელთაშუა ზღვაში.

00:00:21,620 --> 00:00:24,000

დასასვენებელი ადგილია.

00:00:24,000 --> 00:00:26,180

ნამდვილად, ლამაზი და თბილი...

00:00:26,400 --> 00:00:28,680

მზიანი.

ნიშანდობლივია ერთი პატარა ეპიზოდი, რომელიც ორგზის მეორდება ფილმში და ცხადია, არა შემთხვევით: პატარა ბიჭუნას მუყაოს ყუთი

თავზე ჩამოუცვამს და ისე დარბის. შენ რა, აპაჩი⁵ ხარ? – ეკითხებიან უფროსები – არა, ძველი ბერძენი ვარ.

აი, ასე, სრულიად უპრეტენზიოდ და თითქოს ხაზგაუსმელად, პატარა პასაჟებით, რომლებიც ფაბულასთან არანაირ კავშირში არაა, იგრძნობა უკანა ფონი, ერთგვარი ფარული ხაზი – გზა "ძველი ელიზობიდან" ევროკავშირობამდე – კლასიკური მაგალითი იმისა, რაზეც დასაწყისში ვსაუბრობდით – იდენტობის ახალი სტატუსი და მისი მარკერები. წინა პლანზე კი წამოწეულია კვიპროსის დღევანდელი აქტუალური თემები: რა ხდება, როცა შენი საკუთარი ეზო გაეროს კონტროლირებადი ტერიტორიაა, როგორია არჩევნების გაყალბების პროვინციული მოდელი – საქართველოსთვის ბევრ ნაცნობ თუ უცნობ თემას შეგიძლიათ კვიპროსელი რეჟისორის ტრაგიკომიკური პრიზმიდან უყუროთ.

კვიპროსული ფილმების გაცნობის შემდეგ, შეგვიძლია ვთქვათ, რომ ევროკავშირში გაწევრიანების შემდეგდროინდელ კვიპროსში სინამდვილე და კინორეალობა, თავისი სამსახიობო და სტილისტურ-თემატური თავისებურებებით, ერთმანეთის პარალელურად განაგრძობს განვითარებას და მთლიანად ფლობს საკუთარი, საზოგადოებრივი "მეს" განხილვის წინაპირობას, რომელიც შორსაა სწორხაზოვანი და კინოესთეტიკის მხრივ გაუმართლებელი და ცრუ ჰეროიზმისა თუ ყალბი პათეტიკისგან. ცვლილებები თუ სოციალურ-პოლიტიკური ძვრები კვიპროსში აშკარად ჰპოვებს ასახვას კინოს თემატიკაში. კვიპროსელ რეჟისორთა მხატვრული მიეზები ფსიქოლოგიზმით, დრამატიზმით, სოციალურ-კრიტიკული ხედვით და სევდანარევი იუმორით ქმნიან ერთიან პროცესს, რომელსაც მსოფლიოს კინემატოგრაფიაში საკუთარი ხელწერის და ჟღერადობის დამკვიდრება ჰქვია.

გამოყენებული ლიტერატურა

- კუნცევ-გაბაშვილი, ვახტანგ. 2013. *დასავლეთ გერმანიის კინემატოგრაფიის აღორძინება 1945-1980 წლებში*, სადისერტაციო ნაშრომი.
- Carey, Mike. R. 2017. *The Boy on the Bridge*. Orbit.
- Краснова, Галина. 1987. *Кино ФРГ. М.* «Искусство».
- "Искусство кино". 1965. №4.

⁵ აპაჩები – სამხრეთ აშშ-ის წითელკანიანი აბორიგენი ტომები.